

Kalâtdlit - nunâne erkumîtsuliornek - uvdume akagulo

agdlagtok: Kristian Olsen (aaju)

erkumîtsuliortausivta okalugtuagssartâ misigssoruvtigo malugísavarput erkumîtsulioriautsip sarkúmersítagai, amerdlanerpagssuartigut piniartutut inûnerme písamassunik, takussanik ilitsorkússanigdlo túngavekardlutigdlo súnernekautekartarsimassut, okarsínauvugutdlo erkumîtsuliornerup taimáitup sujunigssame piumârtugssat piarêrsarnagit uvdluínarne inûnek tapersersugarisimagâ. erkumîtsuliornermiuna ássilînerut periausekardlune ingerdlassok inuiakatigîngnutdlo ineriartortugssanut píssutsit kanok ítûsimaneránik pásissutigssîlersartok. sujulivta erkumîtsuliornermîkut okalugtuarnerat ilártáinarnago autdlai-vigalugule inuiakatigît inûvfigissavut okalugtuariniartariakarpavut, sujulivta sarkúmiússarisimassâtutdle perkigsârtumik periausekardluta, asule tigdlingniáinarata, tássungame unísaguvta okalugtuarissait sújungnaersitdluínásavavut. ánerartutúme tigussarpara takulerdlugit erkumîtsuliausimagaluartut amerdlasûngordlugit tunissagssiat aningaussarsiutîngordlutik sanapalâgángortut, erkumîtsuliorsínáussusek aserordlugo.

kavdlunât-nunānut atalivingnerup kinguneranik nunavtíne piorsainek autdlartínekarmat, nauk autdlarkáumut súkagissagssausimángíkaluardlune tekníkîkut sujuariartornek imatut súkarssortigisimavok, avdlât inugpagssuit malingnauniapilôrtariakalersimavdlutik, tamatumavdlo kinguneranik píssutsine sujumulit sorkuterkârsimángissane avdlâssarne sungiússiniapilôrnerdlo takor-

nartaujuaalersimáput. inuiakatigît taimailivdlutik akúnermingne ajornartorsiuterpagssuit akiorniagagssatik iserfigisimavait avatânitdlo issiginekautigilerdlugit. tauva uvdlumîkut erkumîtsuliorníkut ilisarnautigileriartugkavut, piniartûnerup erkumîtsuliorfiunera teknikíkutdlo ineriartupilôrnerup erkumîtsuliorníkut nokangassumik sarkúmersarnera, okimaekatigîngingârmata igpingnarsiarput. sôrdlume uvdlumîkut píssutsit issigîngitsússârdlugit uvdlut erkigsisimârfiugaluardlutik nâgdliúnartokartuartartut singnagtoriuáinalerivut. tamatumúnga atatitdlugo ersserkigsardlara erkumîtsuliornek takornarianutdlo tuniagagssiornek ássigîngissutekardluínartutut issigigíka.

uvdlumîkut nunavtíne erkumîtsuliornivtigut inuiakatigîgtut uvdlut atugkavut ineriartupilôrneruvdlo nakíssusínere piârtumik okalugtuarissariakalerpavut, taimaisiornivtigut nunavta avatanîtunut pâserkuvdlugo nunarssuarput kussanáinarane, piniartokarfiuínarane ekungassumik ineriartorfigssússok. ilisimassar-kortusiartuârnerpútaordlo maligdlugo erkumîtsuliornivtigut misigíssutsit pigíssavut sarkúmersítariakalerpavut sujunigssamilo erkumîtsuliorup inuiakatigît pivdlugit erkarsautai sangminerussaria-kardlugit pásigssáungitsússoríningnek kimagdlugo.

erkumîtsuliorumuna inuiakatigîngne túniusimavdluínartumik pekataussarnera pimôrutdlugo ilíkarniartariakaleríput.